

mais quasi tousiours avec des sentimens de deuotion si tendres & si puiffans, qu'il dit n'auoir point de paroles pour nous les donner à entendre. Souuent, dit-il, ie parle, & ie ne fçay ce que ie dis: On me parle dans le fond [36] de mon ame, i'entends ce qu'on me dit, & ne puis toutefois le redire: alors ie fens comme vn feu dans mon cœur, que ie prends plaisir d'y sentir, & que ie n'ose esteindre: il me semble que ie suis tout proche de Dieu, & qu'il est plus proche de moy, & alors ie croy qu'il y a vn Dieu, à cause que ie le fens. Plus ie l'aime plus ie le veux aimer, & il m'est aduis que ie ne l'aime pas. Je crains de quitter la priere, comme vn homme affamé, qui craindroit qu'on ne luy ostast ce qu'il mange: mais plus ie continuë, plus il me semble que ie ne fais que commencer.

A tout cela nous n'auons rien à dire, sinon: *Beatus quem tu erudieris Domine, & de lege tuâ docueris eum:* car ce bon-homme, depuis huit ans qu'il embrassa la foy, nous fait reconnoistre en sa vie exemplaire & plus pleine de sainteté, que ne font ses paroles, que Dieu seul est son maistre.